

AVERTISSEMENT

# JARDIN

AN

## AMOUROUSTET,

*En pelec'h e tisquer ar féçon evit  
antreteni ervat eur Vestrez.*



E Montroulez, eus a Imprimeri LÉDAN.

*Propriété.*

## AVERTISSAMANT.

Var ton : *Fleuve du Tage.*

Doue, pa grouas  
Adam, hon tad qenta,  
Ountàn a dennas  
Hor mam guenta Eva.  
Lavarat a ras dezo  
En em garout entrezo,  
Beza fidel  
En gloar an Eternel.

P'eo güir hon Autrou  
A zell vel ar c'haera  
Eus e benn-œuvrou  
Hac Adam hac Eva,  
Assur hon oll doctoret,  
An darn-vuia borodet,  
Daoust d'o oll loc'h,  
Na rajent qet güelloc'h.

Lézomp da champal  
Ha da grial bemde  
Nep a fell tamal  
Lezen ar garante.  
En em garomp, va Mestres,  
Bezomp fidel da james,  
Hac evelse  
E plijimp da Zoue.





## JARDIN AN AMOUROUSTET.

*Penos e tle an Amourous en em gomporti en e jestiou  
hac en e viiscamant.*

**P**'oc'h eus c'hoant da garout eur plac'h ha da veza  
caret ganti, evit cundai eur vuez santel assambles,  
et leit, aroc tout, caout vertusiou a furnez, graçou mad,  
honestis ha propreté, rac ouz se oll e seller calz.

Tleout a rit eta, qent eguet tostât ouz eur Plac'h,  
evit ober ho Mestrez anezzi, beza propr, güisquet qem-  
pen, ha delc'hel ho taouarn, ho pisach hac ho pléo  
evel ma zeo dleet, évit na vezot qet qemeret evit eul  
lous hac eur feneant. Gouscoude ne dleit qet tenna va-  
nite eus ho tillat brao; control da ze: bezit humbl ha  
mad dirac an oll, hac er féçon-ze e c'honezot graçou  
mat eur plac'h a féçon, hac e vezot caret ganti.

*Ne dleer get en em sacha eus an imperfectionou naturel.*

Ma n'en doc'h qet avantajet eus a eur visach pe de-  
meus a eur c'horf caer, tachit da c'holo an defotchou-  
ze dre manielou civil ha gracius.

Ulissen devoa eur visach diyallo hac eur c'horf diform;  
mes e vertusiou hac e c'hraçou mad o devoa qement en  
ornet, ma veritas beza enoret gant an oll ronanet all.

Petra eo ar goantiri, némét eur fleuren, pehini hirio  
a vrell, ha varc'hoas ne vezot netra! Rac-se, tachit da  
gaout talantchou caer, evidoc'h da veza eun den brao,  
fur ha modest, hac e vezot caret gant an oll.

*Ret eo tec'hel ouz ar goall gompagnunezou.*

Laqit oves mat da dec'hel ouz goal gompagnunezou , dreist-oll, ouz ar mezvierien , leoudouerien, laeron ha tud lubric, hac eus a guement a ve capabl da ober gaou d'oc'h enor; rac, ha n'o pe nep inclination evit ar viçouze, en eur heuill ar seurt tud , e laqafec'h sònjal fall ouzoc'h. Er c'hontrol , frcantit bepret tud honest ha vertuzus , pere o deveus bepret an humpla respect evit Doue, hac e vezoc'h , dre ho cunde mad , estimet gant an oll : qementse ho rento agreabl d'ho Mestrez.

*En pelec'h an Amourous a dle clasq e Vestrez.*

Mar fell dêc'h clasq eur vestrez evit e c'harout en honestis , e zeo ret dêc'h mont er plaçou ma ouzoc'h e ve calz a dud, rac hi na dle qet dont d'ho clasq ; mes c'houi eo oc'h-unan a dle ober an demarchou qenta , pa zeo güir oc'h eus ezom anezi : evel en eureujou , er festou ar goadiguennou , er marc'hajou , er foarriou , er pardonnaiou , el leuriou nêvez , elec'h ne vanqont james da vont, evit caout ar blijadur d'en em disqueuz : eno ec'h ellit ober ho choas. Ha p'o pezo cavet unan agreabl d'ho taoulagad ha d'ho calon , en em informit petra eo e c'herent, he c'halite hac e c'hundu , evit na gollot qet ho poan hac hoc'h amzer d'he c'harout ha d'he zervicha ; rac bez e zeus calz hac a ra muioc'h a gaz eus ar goantiri hac eus ar prestanç vrao , eguet eus ar furnez hac eus an enor.

Ret eo eta dêc'h güelet ha c'houi a zo dign eus anezi hac hi diouzoc'h ; anfin, ha c'houi a zo convenapl an eil ouz equile, rac pa chass ar c'hezeg ingal , ar c'har a ya güelloc'h aroc.

Mes mar tigüe dêc'h bea laqet ho carante en eur plac'h pinvidicoc'h eguedoc'h, bezit soignus mat da veza parfet en tout, evit, pa vezot demeet, ne devezo biqen lec'h da reproch dêc'h ho paourente , ha da ober bombanç eus he

madou, ha na deufec'h da vea mevel elec'h bea mestr.

Ma ne dê qet quer pinvidic ha c'houi, laqit evés mat d'e c'homzou ha d'e c'hundu, evit n'ho pezo biqen queuz da veza demezetdezi; racau demeziou grêta volonte vat hac hep interest, a zo calz agreaploc'h da Zoue eguet ar re all, dreist oll pa ve bet consantamant ar herent, rac neuze, ero e venediction d'ar priejou a ve digu, dre m'o deveus roet ar breferanç d'an honestis var ar madou.

*Discours eun Amourous evit tostât da eur Plac'h  
pehini en em guev en compagnunez re all,  
hac evit disclêrya dezi ar garante zo eviti.*

Ho madelez hac ho craçou mad am doug da dostât ouzoc'h. Ne ouzòn qet ha ne zisplijo qet dêc'h an har-dieuez a guemerân da zont d'oc'h abordi; mes ne allân qet miret da c'houlen diganêc'h piou oc'h eus choazet evit caout ar boneur da veza ho servicher, ho touç hac ho mignon.

*Ar Vestrez.* Eleal, den yaouanc, gallout a rân assuri dêc'h penos presanç eun den qen honest ha c'houi ne alfe biqen displijout; ar c'hontrol è : en em estimout à rân enoret bras demeus ho compagnunez; mes evit ar pez a zo demeus va zervicher, ec'h allân assuri dêc'h ne meus nicun.

*An Amourous.* Ha possabl ve ! Me gred e rit goap ac'hanon, rac ar graçou caer, ar furnez hac an oll galiteou precius a remercânn ennoc'h, a ra din credi ferm penos ne allit qet bea hep caout eun Amourous.

*Ar Vestrez.* Va c'hredi mat a ellit, den yaouanc ; ne lavarân nemet ar virione.

*An Amourous.* Gûelet a rân dre al liou eus ho pizach penos oc'h eus mez ouz en henvel : mes en em assurit, rac ne allân qet credi e ve eur plac'h quer coant hep eur zervicher.

*Ar Vestrez.* Va fardonit, den yaouanc, mar plîch ganêch.

*An Amourous.* Mar deo güir a lavarit, em rentit meurbet contant. rac me garfe caout ar boneur da gavet evit Mestrez eur plac'h quer caer ha c'houi; mes mil aoun a meus na ve ho speret occupet eus a eun all benac.

*Ar Vestrez.* Peguen incredul oc'h ! Penos a fell déc'h elavarfen ar pez ne ouzòn qet ? Credit mat ac'hanon : n'ouzòn qet en pelec'h e mân, na piou eo.

*An Amourous.* Plac'h yaouanc, aoun a meus da zisplijout déc'h, rac ma teufe biemâ hoc'h amourous da gozeal ganêc'h, mar teze e ven cos ne gretfe qet tostât : rac-se, mar fell déc'h, e zàn d'en em denn ; mes qent eguet partia, deurvezit permetti dîn rîe eur poc déc'h evit ho mignon : zé am rentfe meurbet contant, rac n'oun qet evit miret da gredi e ve libr ho calon.

*Ar Vestrez.* Na c'houi zo goapaüs da zont da gomz dîn er guiz-se ! rac gouzout a ran ervat ne veritâu qet e teufe den yaouanc ebet d'am darempredi.

*An Amourous.* Oh ! va fardonit, plac'h yaouanc ; qement a c'hraçou hac a furnes a remercian ennoc'h, m'en em estimfen eürus meurbet da vea ho servicher. Plijet eta ganêc'h, qent ho quittât, caout ar vadelez da lavarat dîn var biou oc'h eus tolet ho choas ; rac ma noc'h eus qet grêt, evel a lavarit, ha m'ambe ar boneur da vea dign ha capabl da veritout ac'hanoc'h, e qemerfen an hardiequez da dosât ouzoc'h evit ho servicha ha disqueuz déc'h peguement eo leun va c'halon ac'hanoc'h.

*Ar Vestrez.* Va Doue, na c'houi a goze brao ! Mes biqen va speret na va zêod ne vint capabl da respont d'ho complimantchou ; rac eur plac'hic qèz eveldon ne verit qet bea ho servicherez, ha n'ê qet dign da gaout eur servicher eveldoc'h ; rac-se, m'ar deo evit goapât elavarit qement-se, me ho ped d'en-em denn, ha da glasq' re all da basseal hoc'h amzer.

*An Amourous.* Ha possabl ve, fleuren ar c'hanton, e sönchfac'h e ven qen insolant da zont da ober goab eus an objet precius da beini va c'halon ne c'houlen

nemiet bea ar servicher humpla evit ar rest eus e vue ! Qentoc'h e carfen bea māro eguet rēi dēc'h ar squeud eus a eur seurt soupçon; mes güelet a rān ervat oc'h eus aoun da lavarat dīn ho polonte. N'o pezit morc'het ebet, me ho suppli, rac brēmā eo ret digueri ar galon, ha comz hardiamant da eur servicher.

*Ar Vestrez.* Cōves a rān e zōn simpl; mes Doue d'am miro na ven quer zodes da zont d'en em angaji ha da gredi quer buan d'ho comzou; mes pa lavarit eo poent digueri ar galon, bezit ar vadelez da assuri dīn da guenta hac ar pez a lavarit a c'hinou, a zo evelse en ho calon.

*An Amourous.* Pardonit dīn, mar teuān d'och importuni; mes ar garante ardant a meus evidoc'h am forç da gomz gant qement hardieguez, evit disqueuz dēc'h penos va oll dezir eo d'ho carout, d'ho servicha, ha da vea caret ganēc'h.

*Ar Vestrez.* Carout a rān Doue, an enor hac an oll : Petra' fell dēc'h ouspen ?

*An Amourous.* Qementsezo ervat; mes güelloc'h ec'h alfec'h c'hoas lavarat em profit, m'o pije hepken laveret ia; rac güelet a rān bremān ervat penos an hini en defe ar boneur da gaout ho carante, a ve meurbet eurus. Rac-se ho pedān, hep dale davantach, da lavarat dīn franchamant ha c'houi am c'har, ha contante vec'h-hu d'am receo evit ho mignon hac ho servicher.

*Ar Vestrez.* Hola ! eun tamic re oc'h importun ; an dra-ze na bress qet qement hac a lavarit, rac lavarat a rēr eo ret en em anaveout qent eguet en em garout.

*An Amourous.* Güir eo ze, rac goude ho peza güelet dija meur a vech, hac ho peza anavezet carguet demeus an oll berfectionou, en em gafen eurus bras, ma ven servicher da eur vestrez quer coant, quer vertuzus, qen douç ha qen parfet ha c'houi. Rac-se, va douç, mar fell dēc'h va receo evit ho mignon, e ve ze va brassa boneur : lavarit dīn eta, me ho suppli, hac an hui a garit a zo tost dēc'h.

*Ar Vestrez.* Gouzout a rit ervat e meus c'hoas lavaret dêc'h penos e caran an enor dreist pep tra oll.

*An Amourous.* Ha possabl ve em estimfec'h quer ma-leürus da nonpas oc'h estimout nemet evit ho tanve! Nan, nan; ho carout a rân a greiz va c'halon, mes en pep honestis; rac-se eta, ne ziferit qet bremâñ da lavarat dîn ho polonte; aon a meus na rafec'h nep caz diouzòn: Daoust da guementse, me zo ho servicher a greiz calon.

*Ar Vestrez.* Ne douetân mui demeus ho carante; n'en em informâñ qet eus ho madou; mes gouzout a rit ervat n'en dòn evit prometi nac ober netra hep avis ha consantamant va zud.

*An Amourous.* Guelet a rân ervat, dre ma zoc'h eusa eur famil vad, ne allit qet bea hep servicher, pa ne fell qet dêc'h lavart ia; mes lavarit da viana nan.

*Ar Vestrez.* Perac n'am c'hredit qet? Lavaret a meus dija dêc'h meura vech, hac e lavarâñ c'hoasevit ar vech divea, penos ne anaveâñ den da vea servicher dîn.

*An Amourous.* Lavarat a rit noc'h eus qet a zervicher; me ive a assur dêc'h ne meus mestrez ebet. Ho pedi a rân eta c'hoas, mar am c'havit dign ouzoc'h, da lavart dîn ia, rac terrupl bras e tezirâñ ze.

*Ar Vestrez.* Evit laqat fin d'ho tiscoursiou hac ar repos en ho speret, e fell dîn avoalc'h lavarat ia; mes en condition penos va zad ha va mam a rayo ar pez a blijo dê, rac int è ar mestrou.

*An Amourous.* O caera comz! ô coanta ia! M'en assur dêc'h, va douç, penos va c'halonic paour a stracl em c'hreiz gant ar joa. Mes n'en deo qet avoalc'h se, rac ret eo c'hoas, evit an esperanç demeus ho carante, permeti dîn rîê dêc'h eur poqiq.

*Ar Vestrez.* Clêvet e meus alies lavaret n'en dê qet mat poqat d'ar botret; rac-se, me ho ped d'am excusi. Mes evit oc'h assuri deus va c'harante sincer evidoc'h, ne refusin qet dêc'h eur poqiq hep mui qen, nemet e vo roet gant modesti ha var va dal.

*An Amourous a lavaro, en eur bogat d'e Vestrez :*

Ah! va c'halonic eun Doue! pebes vad a rit din :  
Bremàn e velàñ e carit ac'hanòn.

*Ar Vestrez.* Doucic, doucic eta, va mignonic qès!  
avoalc'h è. Gortozit ma vimp demeet. Güelet a rit-hu  
tud duont ec'h ober goab ac'hanomp ?

*An Amourous.* Evit accomplissa an affection hac ar  
volonte vad pere a velàñ ennoc'h bremàn, grit din eta  
ar blijadur da r  i din ar voalen a zouguit var ho piz,  
evit assuran   deuseus ho carante sincer.

*Ar Vestrez.* Gant plijadur er gr  n, sepet ma rentot din  
eur faveur all evit assuran   deus hoc'h amitie.

*An Amourous.* Qementse a zo sur r  sonabl; mes ho pe-  
di a r  n da gaout patientet betec ar goulenou, ha neuze  
em bo eun dra benac de r  i d  c'h hac a vo dign ouzoc'h.

*Ar Vestrez.* Ho trugarecat a r  n calz deuseus an enor  
oc'h eus deurvezet ober din, hac e promett  n d  c'h e  
comzin d'am zud eus an dra-m  , hac en eur lavarat  
d  c'h qen a vo, e z  n ho servicherez humbl.

*An Amourous.* Va mestrez q  z, me ell assuri e z  n d'o  
quitt  t gant calz a boan ; rac-se, epad an amzer ma vin  
privet ouzoc'h, eur moment a vo deveziou evidon; an  
deveziou a vo blavesiou ; gouscoude, ne ancounac'hain  
biжен ho charmou hac ho perfectionou. Qen a vo eta,  
va c'halonic viau, va ferlezennic ; qen a vo ar blijadur  
d'ho quelet, pehini a vo qenta ma vo possabl din.

*Penos e tle an Amourous saludi ha comz eus e Vestrez.*

Ac'hanta, va c'halonic, penos a rit-hu abaque m'am  
boe ar blijadur d'ho quelet divea ? Pell bras on bet hep  
dont, rac eur g  ir amourous a gav hir an amzer, pa  
ne all qet quelet e vuia-caret.

*Ar Vestrez.* Ah! va mignonic en Douel joa vras a  
ra din ho quelet yac'h; deuseus al liou eus ho pizach,  
e vel  n noc'h qet bet cl  n, a drugar   Doue.

*An Amourous.* Lavarit din ha c'houi oc'h eus comzet d'ho tud demeus hon dessenniou, ha penos o deus ho selaouet : hastit buan, me ho ped.

*Ar Vestrez.* Ia, va Mignon, hac o c'honsantamant o deus roet Demp d'en em garout, hac e teziront memes e vemp souden demezet, mar dê ive contant ho qerent.

*An Amourous.* Ah, va c'halonicq'ez! n'òn qet evit miret da rîe eur bouchic dêc'h evit eur c'hêlou qer caer. Bremâ eta e zê ret Demp assambli hor c'herent hep dale mui.

*Penos e tle an Amourous comz da dud e Vestrez.*

M'ho ped, tudenorabl, da excusi alliberte a guemerân da zont d'ho ty, evit disclêria dêc'h ar garante dener a meus evit Jannedic, ho merc'h, hac ar c'hoant vrás a meus da zont da zemei dêi. Grit din an enor da lavarat din hac approuvi a rit hor zantimantchou.

*An Tad.* Ho trugarecat a ran eus an enor a rit Demp; mes an traou-ze a verit eun tamie reflexion ; rac-se, negavit qet fall e tepondfen c'hoas eun nebeut, evit assuri dêc'h va respont, hac e comzfen d'am mignonet eus a zedre na hanavean qet c'hoas avoalc'h ac'hanoec'h; abars eiz de me allo rîe dêc'h eun assuranç.

*An Amourous.* Moec'h assûr ive ne vanqin qet da zont d'ho caout; ha mar plich gant Doue rîe din ar boneur da vea ho mab-caer, ec'h esperan rîe dêc'h qement a gontatamant evel ma ven eur buguel propr dêc'h. Qen a vo ar c'henta a lavarân dêc'h : En-em recommandi a ran dêc'h ha d'am Mestrez. Hastit a fo, mar plich ganec'h, evit va boneur.

*Evit rîy eur voalen d'ar Vestrez, pa vez tremenet  
ar c'hontrat.*

Va Mestrez, pa è plijet da Zoue ha d'hor c'herent embe hirio ar boneur da vea aliet dêc'h, recevit ar voalen-mâ a roan dêc'h evit ar merq eternel eus va c'harante barfet evidoc'h, pebini a bado het va bue.

*Ar Vestrez.* Va Mignon qèz, ho trugarecât a ràn eus an enor a rit dîn; güir è ne meus-àn qet meritet; mes mar plich gant Doue va c'honservi en bue, e meus güir dezir hac e promettânt déch' d'ho carout, d'ho servicha, ha d'en em gonformi bepret d'ho santimantchou.

*Penos e tle an den a Enor pedi ar c'herent hac ar mignonet da assista d'an eured.*

*An Den Yaouanc.* Bonjour déch', va eont Fanch.

*Fanch.* Bonjour, va mignonet ; pez seurt avel vad ho tigas amàn eta ?

*An Den Yaouanc.* Deut òn abers. . . . . evit ho pedi, c'houi, ho creg hac ho pugale, da zont d'ar Güin-ardant varc'hoas, ha dilun d'an eured.

*Fanch.* Ho trugarecât a ràn eus an enor a rit dîn ; tachout a rimp da vont gant ealz a blijadur : qen a vo eta neuze, va mignonet. Grit hor gourc'hemennou da Bipi, da Janned, da Yoen, ha d'hoc'h oll dud.

*Evit pedi eur Paeron hac eur Vaeronez da zont da henvel eur buguel.*

*An Tad.* Va mignon Guillou, deut oun d'ho pedi da ober din eur blijadur.

*Ar Paeron.* Lavarit dîn petra è va mignon.

*An Tad.* Doue en deus digasset dîn eur buguel, hac ho pedan da ober din an enor da zont d'am zicour da ober eur c'christen mad eus aneân.

*Ar Paeron.* Contant bras òn. Da bed-heur e vo ar yadiant ?

*An Tad.* Da deir heur goude lein, en ilis Sant....

*Pa gasser ar buguel d'an ilis, ar Béleg a c'houlen :*  
Petric en deus roet Doue déch' ?

*Ar Paeron.* Eur potr, pe eur botrez.

*Ar Bêleg. Petra a c'houlen?*

*Ar Paeron. Ar Vadian.*

*Goude ma vo badeet ar buguel, ar Paeron hac ar  
Vaeronez a dle lavarat d'an Tad ha d'ar Vam.*

Va C'homper ha va C'hommer, demeus a eur payan,  
cetu amâ eur C'hristen a laqomp entre ho taouarn, evit  
desqi deân ervate religion, hac e zevel en carante Doue.

*An Tad hac ar Vam.*


Va C'homper ha va C'hommer, ho trugarecat a reomp  
eus an enor oc'h eus grêt demp. Hac evit ar pez a zell  
eus hon never en andret ar buguelic paour-mâ, ni rêyo  
deân evel a dle peb tad ha mam christen.

Mes, azeit ouz taul da zébri eun tam ha da eva eur ban  
ne evit en em rejouissa ganemp eus a eun devez quer caer.

*Ar C'homper hac ar Gommer.*

Ne allân qet refusi netra eus a guement a ouffe ober  
plijadur dêc'h : D'ho yec'het ta, va c'homper Yan, ha  
c'houi, va c'hommer Janned, ha d'ho pugale.





*Lizer da ziscléria da eur plac'h e carer a néi.*

**PLAC'H YAOUANC ,**

Ret è din anfin lavarat dêc'h, muioc'h a galon eguet a c'hinou, penos, demeus an oll merc'het yaouanc eus ar c'hontre, c'houi eo an hini a meus choazet evit va Mestrez, ha pehini a garàñ hac a garin epad va bue; n'en deo qet discoursiou a civilite eo qement-màn ; va c'halon eo en em discléry dêc'h en noaz. Mar douetit eus a guementse, gouennit ar breuvennou a guerfot, ha me ho rento contant. Va dezir ha va joa è lavarat dêc'h bepret e zòn hac e vîn bete fin va bue,

*Ho servicher humbl a greiz calon ,*

**YANNIC AN DOUR-DOUÇ.**

**FIN.**



# YAN HA JANNED,

*PE AN DIFFERANC*

## ENTRE AN AMOUROUSIEN HAC AR PRIEJOU.

**Canomp Amouroustet Janned ,**

**Canomp Amouroustet Yan :**

**N'eus nep plac'h quer coant ha Janned ,**

**Na nep potr quer brao ha Yan.**

**Yan a ra oll vit e Janned ,**

**Ha Janned oll vit he Yan ;**

**Yan a gar oll gant e Janned ,**

**Janned na gar mann hep Yan.**

**N'eus nemet chagrina Janned**

**Evit laqat gouela Yan ;**

**Evit laqat c'hoarzin Janned ,**

**N'eus nemet arliqa Yan.**

**Yan a fich ar boued gant Janned ,**

**Janned a vousc'hoarz ous Yan :**

**Ha qement tra a douch Janned ,**

**Qerqent zo lippet gant Yan.**

**Gant heORN prop'r atao Janned**

**A garg e veren da Yan ;**

**Hac atao scudellic Janned**

**A zo carguet gant he Yan.**

**Ha pa za da gousqet , Janned ,**

**E za ive buan Yan :**

**Yan a gousq tostic d'e Janned ,**

**Ha Janned tostic d'he Yan.**

Qerqent evel ma sav Janned ,  
 E saill eus e vele , Yan ;  
 Yan a glasq bepred e Janned ,  
 Ha Janned bepret he Yan .

Mar dê bep Mestrez eur Janned ,  
 Ha peb Amourous eur Yan ,  
 Ar vreg zo atao eur Janned ,  
 Hac an ozac'h atao Yan .

Yan a zo pried da Janned ;  
 Janned a zo greg da Yan :  
 Yan ne anave mui Janned ,  
 Ha Janned a zizany Yan .

Qement tra' zeu deus a Janned  
 Zo sur da zisplich da Yan ;  
 Pa velot o c'hoarzin Janned ,  
 E velot sur gouela Yan .

Ar frico a brepar Janned  
 A ra heugui calon Yan ;  
 Hac ar güele ma cousq Janned  
 N'en dê qen mui güele Yan .

Yan n'ell mui beva gant Janned ,  
 Janned en em varv gant Yan :  
 Yan gant Doue a garfe Janned ,  
 Janned d'an diaoul a ro Yan .

Au devez ma varvo Janned  
 A vezó devez caer Yan ;  
 Ha ne velot dansal Janned  
 Nomet devez maro Yan .





**D'AM MUIJA CARET!**